

爾時天子說此偈已。頂禮佛足。遶佛三匝。還詣天上。時諸比丘見此事已。於其晨朝。前白佛言。世尊。昨夜光明普曜祇桓。為是帝釋梵天王等四天王耶。二十八部鬼神將耶。佛告比丘。非是帝釋梵天鬼神四天王等。乃是昔日採娑羅花。供養我者。今得生天。持諸香花。來供養我。是彼光耳。爾時諸比丘聞佛所說。歡喜奉行。

五四、功德意供養塔生天緣

佛在王舍城迦蘭陀竹林。時彼頻婆娑羅王。每日三時。將諸官屬。往詣佛所。禮觀世尊。於其後時。年漸老大。身體轉重。不能日日故往禮拜。時諸官人啟白王言。從佛世尊。索於髮爪。後宮之中。造立塔寺。於此禮拜。香花燈明。而供養之。時王然可。往詣佛所。啟白世尊。即以髮爪。與頻婆娑羅王。於其宮內。造立塔寺。懸繒幡蓋。香花燈明。日三時供養。時王太子阿闍世。共提婆達多。共為陰謀。殺害父王。自立為主。尋敕宮內。不聽禮拜供養。彼塔有犯之者。罪在不請。於其後時。七月十五日。僧自恣時。有一宮人。字功德意。而自念言。此

塔乃是大王所造。今者空污。無人掃灑。我今此身分受刑戮。掃灑彼塔。香花燈明。而供養之。作是念已。尋即燃燈。供養彼塔。時阿闍世王。遙在樓上。見彼燈明。即大瞋恚。尋即遣人往看是誰。見功德意然燈供養。使者還來。以狀白王。王敕喚來。問其所由。時功德意。即答王曰。今此塔者。先王所造供養之處。以此良日。掃除清淨。然燈供養。時阿闍世聞是語已。告功德意。汝不聞我先所約敕。功德意言。聞王所敕。然王今者。其所治化。不勝先王。時阿闍世聞是語已。倍增瞋恚。即以劍斬殺功德意。乘此善心。即便命終。生忉利天。身光照耀。滿一由旬。時天帝釋。及諸天等。咸來觀看。而問之言。汝造何福。得來生此。光明殊特。倍勝諸天。爾時天子。即以偈頌。答帝釋曰。

如來出於世

如日月光明

照彼諸黑闇

皆悉普使明

見者生歡喜

心垢自然除

善哉無上尊

眾生良福田

信心修福德 我不惜身命

被害致命終 得生於天上

爾時天子。向於帝釋。說此偈已。頂戴天冠。著諸瓔珞。莊嚴其身。將諸天眾。各齎香花。下供養佛。光明普曜于竹林。倍踰於常。前禮佛足。卻坐一面。佛即為其說四諦法。心開意解。得須陀洹果。即作是言。自念我昔。積於白骨。過於須彌。涕泣雨淚。多於巨海。乾竭血肉。徒喪身命。今以得離。作是語已。遶佛三匝。還于天宮。時諸比丘。於其晨朝。白世尊言。昨夜光明。殊倍於常。為是帝釋梵天。四天王乎。二十八部鬼神大將也。佛告諸比丘。亦非梵天鬼神大將。乃是頻婆娑羅王。后宮嫪女。名功德意。供養塔故。為阿闍世王被害。命終生忉利天。來供養我。是彼光耳。佛說是功德意緣時。有得須陀洹者。斯陀含者。阿那含者。阿羅漢者。有發辟支佛心者。有發無上菩提心者。爾時諸比丘。聞佛所說。歡喜奉行。